



Angerlarsimaffinni varmepumpenik aammalu solcellinik pilersitsinissamut pitsaaqutit aammalu ajoqutit misissornissaanut Naalakkersuisut nassuiaammik suliaqarnissaat pillugu Inatsisartut aalajangiiffigisassaattut siunnersuut. Nassuiaat taakkuninnga ikkussisoqartillugu Namminersorlutik Oqartussat tapiissuteqarsinnaanissaannut aaqqiissummik eqqarsaatersuutunik imaqassaaq. Nassuiaat kingusinnerpaamik EM 2023 Inatsisartunut tunniunneqassaaq.

(Inatsisartunut ilaasortaq Nivi Olsen, Demokraatit)

(Siullermeerneqarnera)

Qujanaq Demokraatit Inatsisartunut ilaasortaataannut Nivi Olsenimut siunnersuummut pitsaasumut.

Inuit piliaannik silaannaap allanngoriartornerata silarsuaq ilisarimasarput, allanngoriartortilerpaa. Pingaartuuvoq, sapinngisarput tamaat silaannaap allanngoriartorneri tamakku akiorniarnissaat. Tassunga atatillugu isiginiartariaqarparput, qanoq mingutsitsinnginnerusumik nukissiornermut ikaarsarneq atuisumut toqqaannartumik malunniuteqassanersoq.

Maani nunatsinni maannamut pingaartumik erngup nukinga ukkatarisimavarput, ataavartumik nukissiorneq oqaluserigaangaatsigu. Tassunga ilaatittariaqarpoq ataavartumik nukissiornerit allat soorlu seqineq anorilu. Nutaanik eqqarsartuartaqarput, ataavartumik nukissiorneq annertusassagutsigu.

Una Demokraatit Inatsisartunut ilaasortaataannit Nivi Olsen-imit siunnersuut varmepumpet solcellillu angerlarsimaffinni pilersinneqarnissaannut tunngavoq. Qularutissaanngilaq, uani ataavartumik nukissiutit eqqartortillugit, minutsitsinngitsutut isigineqartut, taamaattumillu isumassarsiatsialaavoq taakku angerlarsimaffinni ivertinneqarnissaasa pitsaaqutigisinnaasaat ajoqutigisinnaasaallu misissussallugit.

Maluginiarpara, Naalakkersuisut isumassarsiaq ilalernartikkaat. Tamannalumi iluarisimaarpara. Naalakkersuisut allannguutissatut siunnersuuteqarsimapput, allannguutigisillugu, iliuusissatut pilersaarummik sanasoqassasoq nalunaarusiorani. Siunnersuutilli imarisai assigiillutik.

Tamanna tunngavigalugu ataatsimiititaliaq kajumissaarusuppara, aaqqiissutit arlaat suliniaqqinnissamut isumaqarnerunersoq ukkatareqqullugu.

Siunnersuut taamatut oqaasertalerlugu ataatsimiititaliami susassaartumi suliareqqinneqassasoq innersuussutigineqarpoq.